

## НЕДЕЛЯ МЯСОПУСТНАЯ.

### В СУББОТУ ВЕЧЕРА, НА ВЕЧЕРНИ,

По предначинательном псалме обычное стихословие.

На Господи возвах, поставим стихов 10. И поем Осмогласника стихиры воскресны 3, и анатolieвы 3:

И Троида дне подобны 4. Глас 6.

Подобен: Всю отложивше:

Егда хощещи приити, \* суд праведный сотворити, \* Судие праведнейший, \* на престоле славы Твоя седяй, \* река огненная пред Твое судилище ужасающая влечет всех, \* предстоящим Тебе небесным силам, \* человеком же судимым страхом, \* якоже кождо содела: \* тогда нас пощади, \* и части Христе сподоби спасаемых, \* яко благоутробен, \* верою молим Тя.

Книги разгнутся, \* явлена будут деяния человеков, \* пред нестерпимым судилищем: \* возпумит же юдоль вся страшным скрежетанием плача, \* вся видящи согрешившия, \* вечнуюющим мукам, \* судом праведным Твоим отпускаемья, \* и бездельно плачущия Щедре. \* Темже Тя молим Блаже: \* пощади нас поющих Тя, едине Многомилостиве.

Возгласят трубы, и истощатся гробы, и воскреснет человеческое все естество трепещущее, добрая содеявшии, в радости радуются, чающе мзду восприяти: согрешившии же трепещут, люте рыдающе, в муку посылаеми, и от избранных разлучаеми. Господи славы, ущедрн нас яко Благий, и части сподоби возлюбивших Тя.

Плачу и рыдаю, \* егда в чувство прииму огонь вечный, \* тьму кромешную, и тартар, \* лютый червь, \* скрежет же паки зубный и непрестанный, \* болезнь имущу быти без меры согрешившим, \* и Тебе преблагаго нравом лукавым прогневавшим, \* от нихже един и первый есмь аз окаянный: \* но Судие, милостию Твоею спаси мя, \* яко благоутробен.

Слава, глас 8:

Егда поставятся престолы и отверзутся книги, \* и Бог на суде сядет, \* о кий страх тогда ангелом предстоящим в страхе, \* и реце огненной влекущей! \* Что сотворим тогда во многих гресех повиннии человецы? \* Егда же услышим зовуща Его, \* благословенныя Отца в Царство, \* грешныя же отсылающа в муку: \* кто потерпит страшнаго онаго изречения? \* Но едине Человеколюбче Спасе, Царю веков, \* прежде даже кончина не приспее, \* покаянием обратив, \* помилуй мя.

И ныне, Богородичен гласа.

Вход. Свете тихий: Прокимен: Господь воцарися: И прочее.

На литии, Слава, самогласен, глас 7:

Господни разумевше заповеди, \* тако поживем: \* алчущия напитаем, жаждущия напоим, \* нагия облечем, странныя введем, \* болящия и в темнице сущия посетим: \* да речет и к нам \* хотяй судити всей земли: \* приидите благословеннии Отца Моего, \* наследуйте уготованное вам Царствие.

И ныне, глас 7:

**П**од кров Твой Владычице, \* вси земнороднии прибегающе вопием Ти: \* Богородице упование наше, \* избави ны от безмерных прегрешений, \* и спаси души наша.

**На стиховне стихиры Осмогласника по алфавиту.**

**Слава, глас 8:**

**У**вы мне мрачная душе, \* доколе от злых не отрвася? \* Доколе унынием слезиши? \* Что не помышляеши о страшном часе смерти? \* Что не трепещиши вся страшнаго судища Спасова? \* Убо что отвецаеши? \* или что отречеши? \* Дела твоя предстоят на обличение твое, \* деяния обличают клевету твою. \* Прочее о душе, время наста: \* тецы, предвари, верою возопий: \* согреших Господи, согреших Ти: \* но вем Человеколюбче благоутробие Твое, \* Пастырю добрый, \* да не разлучиши мене одесную Тебе \* предстояния, \* великия ради милости Твоея.

**И ныне, Богородичен глас 8:**

**Б**езвестная Дево, \* Яже Бога неизреченно зачещи плотию, \* Мати Бога Вышняго, \* Твоих рабов мольбы прими, Всенепорочная, \* всем подающи очищение прегрешений: \* ныне наша моления приемлющи, \* моли спастися всем нам.

**Отпустительный: Богородице Дево, радуйся: [трижды]**

**И прочее последование бдения.**

## НЕДЕЛЯ МЯСОПУСТНАЯ.

### НА УТРЕНИ,

На **Бог** Господь, на глас тропаря Осмогласника. Тропарь воскресный, и Богородичен, и обычное стихословие.

Припеваем же к сим и третий псалом: На реках Вавилонских: со аллилуиею красною.

Таже, и полиелей. Степенны гласа. Прокимен, и Евангелие утреннее рядовое. псалом 50, и таже:

**Слава, глас 8:** Покаяния отверзи ми двери Жизнодавче, \* утренюет бо дух мой ко храму святому Твоему, \* храм носяй телесный весь осквернен: \* но яко щедр, очисти \* благоутробною Твоею милостию.

**И ныне, Богородичен:** На спасения стези настави мя Богородице, \* студными бо окалях душу грехми, \* и в лености все житие мое иждих: \* но Твоими молитвами \* избави мя от всякия нечистоты.

**Таже, глас 6:** Помилуй мя Боже, \* по велицей милости Твоей, \* и по множеству щедрот Твоих, \* очисти беззаконие мое.

**Множества содеянных мною лютых, \* помышляя окаянный, \* трепещу страшнаго дне суднаго: \* но надеяся на милость благоутробия Твоего, \* яко Давид вопию Ти: \* помилуй мя Боже по велицей Твоей милости.**

**И канон воскресен, и Богородицы на 6: и Триоди на 8.**

**Канон, творение господина Феодора Студита, глас 6.**

### Песнь 1.

**Ирмос:** Помощник и покровитель \* бысть мне во спасение, \* Сей мой Бог, \* и прославлю Его, \* Бог отца моего, \* и вознесу Его: \* славно бо прославися.

**День страшный всенеизглаголаннаго Твоего пришествия страшуся помышляя: убоявся провижду, вонъже предсядеши судити живыя и мертвыя, Боже мой Всесильне.**

**Егда приидеши Боже, во тьмах и тысящах ангельских, небесных начал, и мене окаяннаго, сresti Тя Христе на облацех сподоби.**

**Гряди, прими душе моя, той час и день, егда Бог яве надстанет: и рыдай, плачи, обрестися чиста в час истязания.**

**Ужасает мя и страшит огонь негасимый геенский, червь горький, скрежет зубов: но ослаби ми, остави, и стоянию мя Христе, избранных Твоих сочини.**

**Вожеленнаго Твоего гласа, святяя Твоя зовущаго на радость, да услышу и аз окаянный, и обрящу Царствия Небеснаго неизреченное наслаждение.**

**Не вниди со мною в суд, носяй моя деяния, словеса изыскуй, и исправляй стремления: но щедротами Твоими презирая моя лютая, спаси мя Всесильне.**

**Слава, Троицен:** Троишпостасная Единице, начальнейшая Госпоже всех, совершенноначальное преначалие, Сама нас спаси, Отче и Сыне и Душе Пресвятей.

**И ныне: Богородичен:** Кто роди Сына, несеянна Отчим законом? Сего убо раждает Отец без матере. Преславное чудо! Ты бо родила еси Чистая, Бога вкупе и Человека.

**Катавасия:** Помощник и покровитель \* бысть мне во спасение, \* Сей мой Бог, \* и прослаблю Его, \* Бог отца моего, \* и вознесу Его: \* славно бо прославися.

### Песнь 3.

**Ирмос:** Утверди Господи, \* на камени заповедей Твоих \* подвигшееся сердце мое, \* яко един Свят еси, \* и Господь.

Господь грядет, и кто стерпит страх Его? кто явится лицу Его? Но готова буди, о душе, ко сретению.

Предварим, плачем, примиримся Богу прежде конца: страшно бо судище, на немже вси обнажены станем.

Помилуй Господи, помилуй мя, вопию Ти, егда приидеши со ангелы Твоими отдати всем по достоянию деяний.

Нестерпимый, Господи, гнев, како стерплю суда Твоего, преслушав Твое повеление? Но пощади, пощади мя в час суда.

Обратися, воздохни душе окаянная, прежде даже жития торжество конца не примет, прежде даже двери чертога не затворит Господь.

Согреших, Господи, якоже иный никтоже от человек, прегрешив паче человека: прежде суда милостив буди ми, Человеколюбче.

**Слава, Троицен:** Троице простая, несозданная, безначальное Естество в Троице воспеваемое Ипостасей, спаси ны, верою поклоняющияся державе Твоей.

**И ныне: Богородичен:** Прозябла еси Пречистая безсеменным Рождеством живое Слово, воплощенное во утробе Твоей, непреложное: слава Богомати, Рождеству Твоему.

**Катавасия:** Утверди Господи, \* на камени заповедей Твоих \* подвигшееся сердце мое, \* яко един Свят еси, \* и Господь

### Седален, глас 6:

Помышляю день страшный, \* и плачуся деяний моих лукавых: \* како отвещаю безсмертному Царю? \* коим же дерзновением воззрю на Судию блудный аз? \* Благоутробный Отче, \* Сыне Единородный, \* Душе Святой, помилуй мя.

**Слава:** Во юдоли плача, \* в месте еже положил еси, \* егда сядеши Милостиве, \* сотвориши праведный суд, \* не объяви моя тайная, \* ниже посрами мене пред ангелы: \* но пощади мя Боже и помилуй мя.

**И ныне: Богородичен:** Упование мира благая Богородице Дево, \* Твое и единое страшное предстательство молю: \* умилосердися на удобообстоятельныя люди, \* умоли милостиваго Бога, \* избавитися душам нашим от всякаго прещения, \* едина благословенная.

### Песнь 4.

**Ирмос:** Услыша пророк \* пришествие Твое Господи, \* и убояся, \* яко хочещи от Девы родитися, \* и человеком явитися, \* и глаголаше: \* услышах слух Твой, \* и убояхся, \* слава силе Твоей Господи.

**Н**аста день, уже при дверех суд, душе бодрствуй, идеже царие вкупе и князи, богатии и убозии собираются и восприимет по достоянию содеянных от человек кийждо.

**В** чину своем, монах и иерарх, старый и юный, раб и владыка истяжется, вдовица и дева исправится: и всем горе тогда, не имевшим житие неповинное.

**Н**еумытный суд Твой, неутаенное Твое судище хитрословия, не витий художество крадущее, не свидетелей нещевание отражающее праведное: в Тебе бо Бозе всех сокровенная предстоят.

**Д**а не прииду в землю плача, да не вижду место тьмы Христе мой Слове, ниже связан буду рукама и ногама, вне чертога Твоего изверженный, одежду нетления оскверненную имеяй всеокаянный.

**В**негда отлучиши грешныя от праведных, судяй миру, единого от овец мя Твоих сопричти, от козлищ разлучая мя Человеколюбче, во еже услышати гласа онаго благословеннаго Твоего.

**И**спытанию бываему, и книгам отверзаемым содеянных, что сотвориши, о душе окаянная? Что отвечаеши на судищи, не имущая правды плоды принести Христу, и Содетелю твоему?

**С**лыша богатаго во пламени муки рыданословия, плачуся и рыдаю окаянный, тогожде сый осуждения, и молюся: помилуй мя Спасе мира, во время суда.

**Слава, Троицен:** Сына от Отца, и Духа славлю, яко от солнца свет и лучу: Оваго убо рождественне, зане и рождение, Оваго же происходне, зане и происхождение, собезначальную Божественную Троицу, покланяемую от всякия твари.

**И ныне: Богородичен:** Девая Младенца родившая, и чистоту соблюдшая, Чистая Ты явилася еси Бога рождши и Человека, единого Того во обою зраку: чудо Твое Дево Мати, ужасает всякий слух и помысл.

**Катавасия:** Услыша пророк \* пришествие Твое Господи, \* и убояся, \* яко хочещи от Девы родитися, \* и человеком явитися, \* и глаголаше: \* услышах слух Твой, \* и убояхся, \* слава силе Твоей Господи.

### Песнь 5.

**Ирмос:** От нощи утреннююща, \* Человеколюбче, \* просвети, молюся, \* и настави и мене \* на повеления Твоя, \* и научи мя Спасе, \* творити волю Твою.

**Т**репет неисповедимый, и страх тамо: придет бо Господь, и дело с Ним коегождо от человек: и кто отсюду прочее себе не восплачет?

**Р**ека огненная смущает мя, истаявает мя, стружет мя скрежет зубов, тьма бездны: и како, или что содеяв, Бога умилостивлю?

**П**ощади, пощади Господи, раба Твоего, да не когда предаси мене горьким мучителем аггелом лютым: в нихже несть тамо покоя обрести.

**К**нязь и вождь тамо вкупе, богатый и безславный, великий купно и малый исправится равно: горе комуждо прочее неуготовленному.

**О**слаби, остави Господи, и прости елика Ти согреших, и не покажи мя тамо пред ангелы во осуждении огня, и студа некончаемаго.

**П**ощади, пощади Господи, создание Твое: согреших, ослаби ми, яко естеством чистый, Сам еси един, и иный разве Тебе никтоже есть вне скверны.

**С**лава, **Т**роицен: **Е**диницу естеством Тя Троице воспеваю, безначальную, непостижную, начальственное, царское, пресовершенное единство, Бога, и Света, и Живота, и Содетеля миру.

**И** ныне: **Б**огородичен: **В** Рождестве Твоем паче естества Чистая, закони естества Тебе разоришася яве: ибо без семени раждаеши Превечнаго Бога, от Отца рожденнаго.

**К**атавасия: **О**т нощи утреннююща, \* **Ч**еловеколюбче, \* **п**росвети, **м**олюся, \* и **н**астави и мене \* **н**а повеления Твоя, \* и **н**аучи мя **С**пасе, \* **т**ворити волю Твою.

### Песнь 6.

**И**рмос: **В**озопих всем сердцем моим \* **к** щедрому Богу, \* и **у**слыша мя \* **о**т ада преисподняго, \* и **в**озведе от тли живот мой.

**В**о страшнем Христе пришествии Твоем, егда явишися с Небесе, и поставятся престолы, и книги разгнутся: пощади, пощади тогда Спасе, создание Твое.

**Т**амо ничтоже помощи может, Богу сущу Судии, ни тщание, ни козни, ни слава, ни дружба: разве от дел крепость твоя, о душе моя!

**Т**амо вкупе князь и вождь, нищий и богатый, душе, ни отец возможет ни матери помогающе, ни избавляяй брат осуждения.

**С**трашное душе, истязание помышляюще Судиино, ужаснися отсюда, уготови слово, да не осудишися узами вечными.

**В**озми твое, да не услышу Господи, отсылаемь от Тебе, ниже, еже поиди во огонь проклятых: но возжеленнаго гласа праведных.

**А**дских врат избави мя Господи, пропасти, и тьмы несветимыя от преисподних, и огня негасимаго, и всякия иныя муки вечныя.

**С**лава, **Т**роицен: **Т**роичнаго единства Божество пою, Отца, и Сына, и Божественнаго Духа, единого начала державу, соразделяемаго трем начертаньми.

**И** ныне: **Б**огородичен: **Д**верь Ты еси, Юже един пройде вшедый и изшедый, и ключи не разрешивый девства Чистая, Иисус создавый Адама, и Сын Твой.

**К**атавасия: **В**озопих всем сердцем моим \* **к** щедрому Богу, \* и **у**слыша мя \* **о**т ада преисподняго, \* и **в**озведе от тли живот мой.

### Кондак, глас 1:

**Е**гда приидеши Боже на землю со славою, \* и **т**репещут всяческая: \* **р**ека же огненная пред судищем влечет, \* **к**ниги разгибаются, и **т**айная являютя: \* **т**огда избави мя от огня неугасимаго, \* и **с**подоби мя одесную Тебе стати Судие праведнейший.

**Икос:** Страшное судище Твое помышляя преблагий Господи, и день судный, ужасаюся, и боюся, от совести моя обличаюся, егда имаши сести на престоле Твоем, и творити испытание: тогда отрещися грехов никтоже возможе, истине обличающей, и боязни содержащей: вельми убо возшумит тогда огонь геенский, грешницы же возскрежущут. Темже мя помилуй прежде конца, и пощади мя Судие праведнейший.

### Синаксарь.

**В** сий день втораго и неумытнаго пришествия Христова память творим, юже божественнейшии отцы по двою притчу положиша, яко да не кто во ону Божие человеколюбие уведев, леностно поживет глаголя: человеколюбив есть Бог, и егда греха отлучуся, готово имам все совершити. Сей страшный день зде учиниша, да смертию и чаянием будущих злых устраивше, леностно живущия к добродетели возведут, не надеющихся к человеколюбному точию, но взирати яко и праведн есть Судия и отдает комуждо по делом его. Инако же, и душам прешедшим, подобаше приити и Судии: образ же некий, и настоящий праздник: понеже убо конец всех праздников полагается ныне, якоже и он всех будет по нам конечный. Подобае бо смотрити, яко в будущую Неделю начало мира, и самое от рая падение положат Адамово: настоящий же всех дней конец, и миру самому. В мясопусте же сию положиша, сокращающе, мно, пищу и объядение страха ради праздника, и к милости ближняго нас созывающе. И инако: понеже питавшеся изгнахомся из Едема, и под судом быхом и клятвою: посему настоящий положиша праздник, и яко хоцем {имамы} в другую Неделю Адамом, по образу Едемскому изгнати, дондеже Христос пришед паки нас возведет к раю. Второе же пришествие речеся, зане и первее плотию к нам прииде, но тих и без славы: ныне же с преестественными чудеса приидет, и с явленною светлостию с Небес и с телом, яко да познан будет всеми: яко Сей есть Иже и первее пришедый, и род человек избавивый, и судити паки хотяй Сам, аще добре данная Ему соблюде. Когда убо будет сие пришествие? никтоже весть: сие бо и Господь апостолом скры. Тогда убо знамения некая яви предварити, яже неции от святых пространнее изъясниша. Глаголется же, яко по седмех тысящах лет пришествие Его будет. Прежде же Его пришествия приидет антихрист, и родится, яко глаголет святой Исполит Римский, от жены скверны, и девицы мнимыя, от еврей же суци от племени Данова, иже бяше отрок Иаковль: и ходити убо имать по Христу проходя жительство, и чудеса совершит, елика убо и Христос действова, и мертвыя воскресит. Обаче по мечтанию вся содеет: и рождение, и плоть, и прочая вся, якоже глаголет апостол. {2 Сол. зач. 275.} И тогда, глаголя, открытсся сын пагубы, во всякой силе и знамениих и чудесех ложных: обаче не сам диавол в плоть претворитсся, якоже из Дамаска глаголет Иоанн: но человек от блуда родився, все сатанино действие примет, и внезапно встанет: таже благ и кроток всем явится. И глад тогда велий будет: угодит людем, и Божественная писания пройдет, и посту навькнет: и понудитсся от человек, и царь проповестсся: и возлюбит множае еврейский род, и во Иерусалим достигнет, и храм их воздвигнет. Прежде же седмех лет, якоже глаголет Даниил, приидет Енох и Илия, проповедающе людем не приимати его: сей же емь их умучит, таже и главы их отсечет. Благочествовати же изволившии далече отбегнут, ихже в горах обрет, демонми искусит: умалятсся

же семь лет она избранных ради, и глад будет велик, стихиям всем превращаемым, яко потребитися в мале уже всем. По сих же внезапно яко молния с небес Господние пришествие будет, предыдущу честному Его Кресту: и огненная река клокощущи Ему предыдет, всю землю от скверны очищаючи. Ят же будет абие и антихрист, и его слуги, и предадутся вечному огню. Вострубившим же ангелом, приидет внезапно от конец земли, и от всех стихий, всяк человеческий род во Иерусалим, яко среда мира той: и тамо седоша престолы на суде: обаче с своими телесы и душами, всем к нетлению простихованным, и един имущим зрак: и тем же стихиям на лучшее приемшим изменение. И разлучит едином словом Господь праведныя от грешных. И пойдут благих делатели, вечный живот приемлюще: грешнии же в вечную паки муку, и никогдаже сих престание будет. Ведомо же, яко не поста тогда взыщет, и наготы, и чудес, Христос, добра бо и сия: но множицею сих лучшая, милостыню яве и простыню {сострадание}. Речет бо праведным и грешным шесть неких заповедей: взалках бо, и дасте Ми ясти. Возжадах, и напоисте Мя. Странен бех, и введосте Мя. Наг, и одеясте Мя. Болен бех, и посетисте Мя. В темнице бех, и приидосте ко Мне. Елико бо сотвористе единому сих меньших, Мне сотвористе: яже может всяк кто сотворити по силе. Тогда убо всяк {Филип. зач 240} кто исповесть, яко Господь Иисус Христос, во славу Бога Отца. Муки убо, яже священное Евангелие предаде, сия суть: {Матф. зач 105} тамо будет плачь, и скрежет зубов: червь их не скончается, и огонь их не угаснет, и {Марк. зач 42} вложите его во тьму кромешную. Яже убо вся светло Церковь Божия приемши нещует, пици {сладости} убо и Царствию Небесному быти, с Богом святых спребыванию, будущему оным сиянию всегдашнему и восхождению. Мучению же и тьме, и сицевым от Бога удалению и душам совестию иждивению, како леностию и пищею временною Божественнаго сияния лишися. Неизреченным человеколюбием Твоим Христе Боже, желательнаго Твоего гласа нас сподоби, и сущим одесную Тебе сопричти, и помилуй нас, аминь.

### Песнь 7.

**Ирмос:** Согрешихом, беззаконновахом, \* неправдовахом пред Тобою, \* ниже соблюдохом, \* ниже сотворихом, \* якоже заповедал еси нам: \* но не предаждь нас до конца, отцев Боже

Припадем и восплачемся прежде суда онаго вернии, егда небеса погибнут, звезды спадут, и вся земля поколеблется, да милостива обрящем в конец отцев Бога.

Неумытное истязание, страшный есть тамо суд, идеже Судия неутаен есть, идеже лица несть в дарех прияти: тогда пощади мя Владыко, и избави всякаго гнева Твоего страшнаго.

Господь грядет судити, кто стерпит видение Его? Вострепещи душе окаянная, вострепещи, и уготови исходищу дела твоя, да милостива и милосерда обрящещи Его, отцев Бога благословенна.

Негасимый огонь смущает мя, горчайший червей скрежет, ад душетленный страшит мя, благоумилен отнюд не бываю. Но Господи Господи, прежде конца утверди мя страхом Твоим.



**Припадаю** Ти, и приношу Тебе якоже слезы глаголы моя: согреших, якоже не согреси блудница, и беззаконновах, яко иный никтоже на земли. но ущедри Владыко, творение Твое, и призови мя.

**Обратися** душе, покаяйся, открий сокровенная, глаголи Богу вся ведущему: Ты веси моя тайная едине Спасе, но Сам мя помилуй, якоже поет Давид, по милости Твоей.

**Слава, Троицен:** Три, едино Существом, и едино Лицами, Три пою Сия: Отец, Сын, и Святой Дух, едина сила, хотение и действие. Един Бог Трисвятой, Царство едино единоначальнейшее.

**И ныне: Богородичен:** Проходит краснейший от чертога чрева Твоего Бог, якоже Царь одянный боготканною багряницею, обаяния тайнаго пречистых кровей Твоих, Безвестная, и царствует землею.

**Катавасия:** Согрешихом, беззаконновахом, \* неправдовахом пред Тобою, \* ниже соблюдохом, \* ниже сотворихом, \* якоже заповедал еси нам: \* но не предаждь нас до конца, отцев Боже.

### Песнь 8.

**Ирмос:** Егоже воинства небесная славят, \* и трепещут херувими и серафими, \* всяко дыхание и тварь, \* пойте, благословите и превозносите \* во вся веки.

Страшнаго втораго Твоего, Господи, пришествия помышляя сретение, трепещу прещения Твоего, боюся гнева Твоего: от сего мя часа зову, спаси во веки.

Тебе Богу судящу всяческая, кто стерпит земнороден, сый страстен? Негасимый бо огонь тогда, и червь скрежещущий вельми, осужденныя примет во веки.

Всякое дыхание егда призовеши, еже разсудити Христе вкупе: великий страх тогда, велия нужда, токмо помогающим деянием во веки.

Всех Судие Боже мой и Господи, да услышу тогда гласа Твоего вожделеннаго, да увижду свет Твой великий, да узрю вселения Твоя, да узрю славу Твою, радуясь во веки.

Правосуде Спасе помилуй, и избави мя огня и прещения, егоже мне на суде праведно подъяти: ослаби ми прежде конца, добродетелию и покаянием.

Егда сядеши Судие, яко благоутробен, и покажеши страшную славу Твою Христе: о кий страх тогда, печи горящей, и всем боящимся нестерпимаго судища Твоего!

**Благословим Отца и Сына, и Святаго Духа, Господа.**

Единого Бога по Существоу чту, Три Ипостаси пою определительне, иныя, но не инаковыя: понеже Божество едино в трех Лицах: ибо Отец, и Сын, и Божественный Дух.

**И ныне: Богородичен:** Из светлейшаго чрева Твоего прошед, яко Жених из чертога возсия Христос, Свет велий сущим во тьме: ибо правды Солнце облистав, просвети Чистая мир.

Хвалим, благословим, покланяемся Господеви, поюще, и превозносяще во вся веки.

**Катавасия:** Егоже воинства небесная славят, \* и трепещут херувими и серафими, \* всяко дыхание и тварь, \* пойте, благословите и превозносите \* во вся веки.

### Песнь 9.

**Ирмос:** Безсеменнаго зачатия \* Рождество несказанное, \* Матере безмужныя нетленен Плод: \* Божие бо рождение обновляет естества. \* Темже Тя вси роди, \* яко богоневестную Матерь, \* православно величаем.

Господь грядет грешныя мучити, праведныя же спасти: восплачемся, и возрыдаим, и примем чувство онаго дне, воньже безвестная и тайная открыв, человеком отдаст по достоянию.

Пристрашен и трепетен бысть Моисей, видя Тя от задних: како же постою, лице Твое видя тогда аз окаянный, егда приидеши с Небесе? Но пощади мя Щедре, милостивным Твоим прирзенем.

Даниил убояся часа истязания, аз же окаянный что постражду от него, грядый Господи, страшнаго дне, но даждь ми прежде конца благоугодно Тебе послужити, и улучшить Царствие Твое.

Огнь готовится, червь устрояется: веселие, слава, ослабление, свет невечерний, радость праведных: и кто блаженный избегнути не восхоцет мучения первых, наследивый вторая?

Да мя не отвратит от лица Твоего Господи ярость Твоего гнева: ниже да услышу гласа клятвеннаго, во огонь отсылающаго, но да вниду в радость нетленнаго Твоего чертога и аз тогда со святыми Твоими.

Ум уязвися, тело острупися, болезнует дух, слово изнеможе, житие умертвися, конец при дверех. Темже окаянная моя душе, что сотвориши, егда приидет Судия испытати твоя?

**Слава, Троицен:** Единого Единородителю, единороднаго Сына Отче, и едине единого Свете, Света сияние: и единый едине единого Бога, Святыи Душе, Господа Господь, воистинну сый. О Троице Единице Святая! Спаси мя богословяща Тя.

**И ныне: Богородичен:** Чудо Рождества Твоего удивляет мя Всенепорочная, како зачинаеши безсеменно необыннаго: рцы, како девствуеши рождши яко Мати? Еже паче естества верою прием, Рожденному поклонися: елика хоцет бо, и может.

**Катавасия:** Безсеменнаго зачатия \* Рождество несказанное, \* Матере безмужныя нетленен Плод: \* Божие бо рождение обновляет естества. \* Темже Тя вси роди, \* яко богоневестную Матерь, \* православно величаем.

**Ексапостиларий:** Таже настоящий.

**Подобен:** Со ученики въздем:

Страшный день суда, и неизреченныя Твоя славы, помышляя трепещу Господи всяко, и трясыйся страхом вопию: на землю егда приидеши судити Христе Боже всяческая со славою, от всякаго избави мя мучения, одесную Тебе Владыко сподобивый мя стати.

**Другий: Подобен: Жены** услышите:

Се день грядет Господа Вседержителя, и кто стерпит страх пришествия онаго? День бо ярости есть, и печь горящая, воньже Судия сядет, и по достоянию деяний комужде отдай.

**И ныне: Богородичен: Час** испытания, и страшнаго пришествия Человеколюбца Владыки помышляя, весь трепещу, и сетуя, вопию Ти: Судие мой праведнейший, и едине Многомилостиве, кающася прими мя Богородицы молитвами.

**На хвалитех стихиры воскресны Осмогласника 4: и анатоліев един:**

**И Трїоди 4, глас 6. Самогласны.**

**Стих: Хвалите Его в кимвалех доброгласных хвалите Его в кимвалех** восклицания: \* всякое дыхание да хвалит Господа.

Помышляю день оный и час, \* егда имамы вси нази и яко осуждени, \* неумытному Судии предстати, \* тогда труба возшумит вельми, \* и основания земли подвижатся, \* и мертвии от гробов воскреснут, \* и возрастом едином вси будут, \* и всех тайная явлена предстанут пред Тобою \* и возрыдают, и восплачутся, и во огонь кремешный отыдут, \* иже никогдаже покаяшася: \* и в радость и веселие, \* праведных жребий внидет в чертог Небесный.

**Стих: Исповемся Тебе Господи всем сердцем моим \* повем вся чудеса** Твоя.

О каковый час тогда, \* и день страшный, \* егда сядет Судия на престоле страшном! \* Книги разгибаются, \* и деяния обличаются, \* и тайная тьмы явлена бывають, \* ангели обтекають, \* собирающе вся языки. \* Приидите, услышите царие и князи, \* раби и свободни, \* грешницы и праведницы, \* богатии и нищии: \* яко грядет Судия, \* хотяй судити всей вселенней. \* И кто претерпит пред лицем Его, \* егда ангели предстанут обличающе деяния, \* помышления, и мысли, \* яже в нощи и во дни? \* О каковый час тогда! \* Но прежде даже не приспее кончина, \* потщися зовущи душе: \* Боже, обратив спаси мя, яко един благоутробен.

**Глас 8. Стих: Возвеселюся и возрадоуюся о Тебѣ, \* пою имени Твоему,** Вышній.

Даниил пророк, муж желаний быв, \* властительное Божие виде, \* сице вопияше: \* Судия седе, и книги разгнушася. \* Блюди душе моя, постиши ли ся? \* Ближняго твоего не презри. \* От брашен воздержшиши ли ся? \* Брата твоего не осуждай: \* да не во огонь отсылаема сгориши яко воск, \* но да без поткновения введет тя Христос \* в Царствие Свое.

**Глас 1: Стих: Воскресни Господи Боже мой \* да вознесется рука Твоя, не** забуди убогих Твоих до конца.

Предочистим себе братие, \* царицею добродетелей: \* се бо прииде, богатство нам благих подаючи: \* страстей утоляет дмения, \* и Владыце примиряет прегрешившия. \* Темже с веселием сию примем, \* вопиюще Христу Богу: \* воскресый из мертвых, \* неосуждены нас сохрани, \* славословящия Тя \* единаго Безгрешнаго.

**Слава, Глас 1:**

**Предочистим** себе братие, \* царицею добродетелей: \* се бо прииде, богатство нам благих подаючи: \* страстей утоляет дмения, \* и Владыце примиряет прегрешившия. \* Темже с веселием сию приимем, \* вопиюще Христу Богу: \* воскресый из мертвых, \* неосуждены нас сохрани,\* славословящия Тя \* единого Безгрешнаго.

**И ныне: Преблагословенна еси:**

Славословие великое: и отпуст. Таже, обычная лития в притворе, в нейже поем: Слава, и ныне, стихиру евангельскую. Присовокупляем и час 1-й, в немже читется оглашение преподобнаго отца нашего Феодора Студита.

## НЕДЕЛЯ МЯСОПУСТНАЯ.

### НА ЛИТУРГИИ

И блаженна гласа, на б: и от канона Триоди песнь 6, на 4.

Во страшнем Христе пришествии Твоем, егда явишися с Небесе, и поставятся престоли, и книги разгнутся: пощади, пощади тогда Спасе, создание Твое.

Тамо ничтоже помощи может, Богу суцу Судии, ни тщание, ни козни, ни слава, ни дружба: разве от дел крепость твоя, о душе моя!

Слава: Тамо вкупе князь и вождь, нищий и богатый, душе, ни отец возможет ни матери помогающе, ни избавляяй брат осуждения.

И ныне: Страшное душе, истязание помышляюще Судиино, ужаснися отсюда, уготови слово, да не осудишися узами вечными.

### Кондак Триоди, глас 1:

Егда приидеши, Боже, на землю со славою, \* и трепещут всяческая, \* река же огненная пред судищем влечет, \* книги разгибаются, и тайная являються, \* тогда избави мя от огня неугасимаго \* и сподоби мя одесную Тебе стати, Судие Праведнейший.

Прокимен, глас 3: Велий Господь наш, и велия крепость Его, \* и разума Его несть числа.

Стих: Хвалите Господа, яко благ псалом, Богу нашему да усладится хваление.

### Апостол к Коринфяном, зачало 140.

Братие, брашно нас не поставит пред Богом: ниже бо аще ямы, избыточествуем, ниже аще не ямы, лишаемся. Блюдите же, да не како власть ваша сия преткновение будет немощным. Аще бо кто видит тя, имуща разум, в третице возлежаща, не совесть ли его немощна суци созиждется идоложертвенная ясти? И погибнет немощный брат в твоём разуме, егоже ради Христос умре. Такоже согрешающе в братию, и бьюще их совесть немощну суцу, во Христа согрешаете. Темже аще брашно соблазняет брата моего, не имам ясти мяса во веки, да не соблазню брата моего. Несмы ли апостол? Несмы ли свободь? Не Иисуса Христа ли Господа нашего видех? Не дело ли мое вы есте о Господе? Аще убо иным несмы апостол, но убо вам есмь. Печать бо моего апостольства вы есте о Господе.

### Аллилуиа, глас 8.

Стих: Приидите возрадуемся Господеви, воскликнем Богу Спасителю нашему.

Стих: Предварим лице Его во исповедании, и во псалмех воскликнем Ему.

### Евангелие от Матфея, зачало 106.

**Рече́** Го́сподь: егда́ приидет Сын Человѣческій в сла́ве Своёй и вси свя́тии а́нгели с Ним, тогда́ сядет на престо́ле сла́вы Своёя. И соберу́тся пред Ним вси язы́цы, и разлучи́т их друг от друга́, яко́же па́стырь разлуча́ет о́вцы от козлищ. И постави́т о́вцы одесную́ Себе́, а козлища́ ошу́юю. Тогда́ рече́т Ца́рь су́щим одесную́ Его́: прииди́те, благослове́ннии Отца́ Моего́, насле́дуйте уготованное вам Ца́рствие от сло́жения ми́ра. Взалка́хся бо, и да́сте Ми я́сти: возжа́дахся, и напои́сте Мя: страна́н бех, и введо́сте Мене́. Наг, и оде́ясте Мя: бо́лен, и посети́сте Мене́: в темни́це бех, и приидо́сте ко Мне. Тогда́ отве́щают Ему́ пра́ведницы, глаго́люще: Го́споди, когда́ Тя ви́дехом а́лчуца, и напита́хом; или́ жа́ждуца, и напои́хом? Когда́ же Тя ви́дехом страна́на, и введо́хом; или́ на́га, и оде́яхом? Когда́ же Тя ви́дехом бо́ляща, или́ в темни́це, и приидо́хом к Тебе́? И отве́щав Ца́рь рече́т им: ами́нь глаго́лю вам, поне́же сотвори́сте еди́ному сих бра́тий Моихъ ме́нших, Мне сотвори́сте. Тогда́ рече́т и су́щим ошу́юю Его́: иди́те от Мене́, прокля́тии, во о́гнь вѣчный, уготованны́й диаволу́ и а́нгелом его́. Взалка́хся бо, и не да́сте Ми я́сти: возжа́дахся, и не напои́сте Мене́. Страна́н бех, и не введо́сте Мене́; наг, и не оде́ясте Мене́; бо́лен и в темни́це, и не посети́сте Мене́. Тогда́ отве́щают Ему́ и тии, глаго́люще: Го́споди, когда́ Тя ви́дехом а́лчуца, или́ жа́ждуца, или́ страна́на, или́ на́га, или́ бо́льна, или́ в темни́це, и не послужи́хом Тебе́? Тогда́ отве́щает им, глаго́ля: ами́нь глаго́лю вам, поне́же не сотвори́сте еди́ному сих ме́нших, ни Мне сотвори́сте. И и́дут сии́ в му́ку вѣчную, пра́ведницы же в живо́т вѣчный.

**Прича́стен:** Хвали́те Го́спода с Небе́с, хвали́те Его́ в Вы́шних.

**Други́й:** Ра́дуйте́ся, пра́веднии, о Го́споде, пра́вым подоба́ет похва́ла. Аллилу́иа, [трижды]